



**Jubilæum Sæculare Ecclesiæ Catholicæ Per Septendecim  
Sæcula Militantis & Triumphantis Contra Idololatriam,  
tyrannos, hæreses, schismata, errores, & scandala**

Per Septendecim Sæcula Militantis & Triumphantis Contra Idololatriam,  
tyrannos, hæreses, schismata, errores, & scandala ; Ex Annalibus  
Ecclesiasticis collectum Pro Xenio Oblatum Academicæ Sodalitati  
Dominorum B. Mariæ Virginis Annunciatæ Herbipoli, Anno ...

**Herbipoli, 1699**

Decas V. ab anno 40. ad 50.

---

[urn:nbn:de:hbz:466:1-64743](https://nbn-resolving.org/urn:nbn:de:hbz:466:1-64743)



Sedis hujus institutæ memoria recolitur, ab Ecclesia 8. Kal: Martii. Selecta autem fuit Antiochia pro erigenda prima Sede, quia tunc temporis Orientis caput erat, cui plures provinciæ & ipsa Palæstina subjacebat, Ut sic civilem potentiam Ecclesiastica sequeretur.

\* 40. Herodes cum Herodiade ab Agrippa litteris apud Cajum de proditione accusatus, Lugdunum in Galliam exul relegatur cum verò Cajus audisset, Herodiadem esse sororem Agrippæ & in ejus gratiam ab exilio Herodiadem liberare vellet, Herodias magno animo recusavit, afferens, non esse æquum, ut cui secundæ fortunæ extitisset socia, eum in adversâ defereret. ita Josephus.

Petrus hoc anno plurima loca peragrat & doctrinâ ac miraculis illustrat: in Joppe præsertim Tabitham Christianam sanctissimam fœminam nuper defunctam ad vitam revocat.



## DECAS V.

\* ab anno 40. ad 50. \*

41. **M**atthæus hoc anno scripsisse perhibetur Evangelium Hierosolymis, ut vulgò asseritur Hebraico Sermone, tum Judæis, qui crediderunt, tum Apostolis id exposcentibus.

Cajus



Cajus Imperator imperat Judæis statuam suam collocare in templo Hierosolymitano, vultque passim divinis honoribus adorari.

✽ 42. Petronius statuarius flexus Judæorum lamentis differt Sidone statuam Hierosolymis inferendam perficere, interea Agrippa Cajo supplicat, ne statuæ dedicationem novis mandatis urgeat, idque ceu maximam gratiam ab Imperatore tandem obtinet.

Judæi multis cladibus atteruntur, Syris & Græcis contra eos arma ferentibus.

✽ 43. Cajus Imperator conjuratione Cassii Chereæ & Sabini Tribunorum militum Prætorianorum occiditur. Periit quoque uxor ejus Cæsonia, gladio à Centurione confossa, & filia parieti illisa.

Factione militum Prætorianorum Imperium capescit Tiberius Claudius Drusus Germanicus.

CHRISTIANI primùm dicti Antiochiæ. Quia verò hæretici quoque paulò post idem hoc nomen sibi usurpârunt, & suos quoque sectatores Christianos appellârunt, quod fecisse primò Carpocratianos Epiphanius docet, ideo, ad veros Christianos à falsis distinguendos, nomen CATHOLICUM ab ipsis Apostolis inventum est. Et hoc quidem cognomen tam proprium est ve-



ræ Ecclesiæ, ut cum serio res acta fuit, nulli unquam hæretici id ausi fuerint usurpare, ut affirmat S. Augustinus cont. Epist. fund. c. 1.

S. Thadæus sanat Abagarum Regem, & Edeffenos convertit ad Christum.

✠ 44. S. Jacobus filius Zebedæi, & frater Joannis ab Agrippa Herode capite truncatur & Martyrio coronatur.

Petrus in Carcerem detruditur, & ab eo per Angelum liberatur.

Constituitur ab Apostolis Hierosolymis SYMBOLUM, quod dicitur APOSTOLORUM, tanquam prima regula Christianitatis, & fundamentum unitatis ac doctrinæ universalis, quo posito in omnem terram divisi nomen Christi ad gentes portaverunt.

*Fuit Symbolum istud non scripto, vel in membranis exaratum, sed tantum in cordibus singulorum retentum, ut certum esset, hoc neminem ex lectione, quæ interdum, etiam ad infideles pervenire solet, sed ex Apostolorum traditione didicisse. ita S. Hieronymus, S. Ambrosius & S. Augustinus.*

Singulis Apostolis ad suas Provincias abeuntibus, S. Petrus ad Simonis Magi pestiferam corruptelam abolendam Romam venit.

Ingenti fame universus orbis vexatur:

in



in cuius remedium Christiani Antiochiæ collectas pecunias ad Christianos in Judæa existentes per Saulum & Barnabam transmittunt, quæ pia consuetudo, in Ecclesia diu perduravit, ultra tempora Theodosii. Propagatum ex eiusmodi sacris Apostolicis Institutionibus in Ecclesiam Catholicam, ut in quotidianum pauperum usum singulis diebus Dominicis collectæ fierent.

✱ 45. à Petro Apostolorum Principe, qui anno superiore venerat, Romana Ecclesia totius orbis Princeps instituitur, & Sede Pontificiâ decoratur. In cuius rei memoriam perennem, celebritas annua habetur in Ecclesia, & S. Petri Cathedra lignea in Basilica Vaticana asservatur. Stabilitâ Romæ in hunc modum Cathedrâ Petri Antiochena alteri cessit: absq; tamen principatûs in Ecclesiam universalem prærogativa, quæ soli Romanæ Cathedræ Petri annexa est.

Petrus Provisurus Ecclesiæ Antiochenæ, primam suam Epistolam Romæ scribit. Quod verò addat in fine, *salutat vos Ecclesia quæ est in Babylone collecta*, id facit propter magnificentiam urbis, cum vitiis tunc conjunctam: quam vocem Novatores derivant in Romam modernam: sed non minore

nore



nore contumeliâ quam illa sit, quâ multi negant Petrum Romæ unquam sedisse.

S. Marcus latinè vulgavit hoc anno suum Evangelium.

✱ 46. Herodes Agrippa Cæsareæ in veste splendida orationem habet, & divinos sibi honores arrogans ab Angelo percussus, atque ita computrefactus est, ut totum corpus in vermes abierit.

Paulus & Barnabas Paphum venientes, Sergium Paulum Proconsulem ad fidem Christi convertunt, prius excæcato ad tempus Elymâ mago: qui tamen minimè resipuit, sed magis ac magis insanians Evangelio se opposuit.

✱ 47. Paulus Iconium Lycaoniæ pervenit, & Theclam ad Christum convertit admirabilem illam in purpurato choro Martyrum sceminarum antelignanam & Proto-Martyrem.

✱ 48. Beatissima Virgo vitâ functa, cum corpore & anima in cœlum assumitur.

✱ 49. & 50. ✱ Romæ incrementum sumit Evangelii fructus & vilescit profana aruspicum disciplina, frustra Claudio Imperatore Senatusconsulto se se opponente contra externas superstitiones, sub quo nomine Christiana religio tunc temporis comprehendebatur.

DE.